

La speronza – sin chistas da muniziun

Text e fotos: Augustin Beeli/FMR

Dapi duas jamnas san ins visitar ella baselgia claustralala dallas soras dominicanas da Glion in'exposizion dad iconas. Ils dus artists ucrains Sonia Atlantova ed Oleksandr Klymenko muossan quei ch'els fan cun chistas da muniziun dall'uiara.



Entrond ella baselgia dalla claustra da Glion seferman ins avon l'emprema tabla. Quella ei tschentada sin in cavalet da malegiar, muossa in cavalier che semeglia sogn Gieri che mazza il drag. Sil secret sper la tabla san ins denton leger: S. Dimitri. Igl ei in dils sogns pli populars dallas baselgias ortodoxas cristianas. Dimitri ni Demetrios ei il patrun da Thessaloniki, Constantinopel e Venezia, el vala sco protegider dalla schuldada ell'uiara. Chistas per destruir veta

Forsa perquei han ins pazzau quella icona all'entrada dalla baselgia. Il sogn che la schuldada venerescha ha Oleksandr Klymenko secret sigl uvierchel d'ina chista da muniziun. En connex cugl art da far iconas discuoran ins da «scrivere» e buca da malegiar. En tut san ins admirar, el silenzi che la baselgia claustralera derasa, 16 talas ovras.

Gl'artist ucrain e sia consorta Sonia Atlantova scrivan dapi il 2014, dapi las empremas attaccas russas egl ost dalla Ucraina, iconas sin chistas da muniziun. Els vivan a Kiew e han rimnau massa tals conteniders da lenn stabils, cun isaglia, guotas e strubas da ruina. Sin viadi tras l'Europa

Sin quei material scrivan els iconas dalla tradiziun ortodoxa. L'Ucraina ei ina naziun cristiana cun profundas ragischs tochen tiels apostels. Ina icona muossa sogn Pieper, outras Nossadunna dallas dolurs, ils arzaunghels Michael e Gabriel, sogn Gieri, lu sogn Antoni gl'eremit, era in sogn impuront dalla Baselgia digl ost.

«Las chistas da muniziun vegnan duvradas per destruir la veta. Nies siemi eis ei da contribuir alla pasch, alla veta. Ina icona sa buca frenar l'uiara, denton dar speranza», san ins leger alla meisa d'informaziun dall'exposiziun. Il project cul num engles «Icons on Ammunition Boxes» ha il pèr saviu presentar el parlament europeic a Brüssel, els parlaments dall'Ucraina e Lituana ed en Pologna. Sur Tiaratudestga, Italia ed otras tiaras ei ella vegnida en Svizra. Sora Ingrid Grave ha viu ella ils 10 da settember digl onn vargau a Cuera, a caschun dil giubileum da 50 onns «Glaube in der zweiten Welt G2W». Duront in discuors ha Oleksandr Klymenko dumandau sch'ei fusi pusseivel da presentar las iconas ella claustra da Glion. Dils 26 da fevrier tochen ils 26 da mars 2023 ei l'exposiziun impressiunonta leu. Sco quei che las soras han confirmau, ei gl'interess gronds da veser las iconas sin chistas da muniziun.

* Il project d'art «Icons sin chistas da muniziun» san ins visitar tochen ils 26 da mars 2023, ella baselgia claustralera da Glion. L'exposiziun ei aviarta mintgamai da gliendisgis tochen sonda, dallas 9.00 tochen las 17.00, la dumengia dallas 11.00 tochen las 17.00.





Icona digl arzaunghel Michael. Fotos Augustin Beeli